

ՊԱՇՏՈՆԱԿԱՆ ԸՆԴԴԻՄԱԽՈՍԻ

ԿԱՐԾԻՔ

ՄԱՐԻԱՄ ԱՐԱՄԻ ՍԻՐՈՒՆՅԱՆԻ

«ՊԱՏԵՐԱԶՄԸ ԵՎ ՕԼԴԻՆԳԹՈՆԻ ՎԵՊԵՐԸ. ԲԱՐՈՅԱԿԱՆ ԵՎ ՍՈՑԻԱԼԱԿԱՆ ԱՍՊԵԿՏՆԵՐ» Ժ.01.07-«Արտասահմանյան գրականություն» մասնագիտությամբ բանասիրական գիտությունների թեկնածուի գիտական աստիճանի համարատենախոսության մասին

ՄԱՐԻԱՄ ԱՐԱՄԻ ՍԻՐՈՒՆՅԱՆԻ «ՊԱՏԵՐԱԶՄԸ ԵՎ ՕԼԴԻՆԳԹՈՆԻ ՎԵՊԵՐԸ. ԲԱՐՈՅԱԿԱՆ ԵՎ ՍՈՑԻԱԼԱԿԱՆ ԱՍՊԵԿՏՆԵՐ» թեմայովատենախոսությունը նվիրված է 20-րդ դարի հետպատերազմյան արձակում իր կարևոր դերն ունեցող անգլիացի բանաստեղծ, արձակագիր և գրաքննադատ Ռիչարդ Օլդինգթոնի արձակի սոցիալական և բարոյական հիմնախնդիրների վերհանմանը:

Ատենախոսությունը՝ մեթոդաբանական բազային հենքով, գրականագետ-տեսաբանների ներկայացրած տեսական դրույթների հաշվառմամբ՝ գալիս է հավաստելու անգլիական գրական արձակում ի հայտ եկած զարգացումները: Աշխատանքի առավելություններից է, որատենախոսը մանրամասն և հետևողականորեն հետազոտել է սակավ անդրադարձ ունեցող, հայ ընթերցողին առաջին անգամ ներկայացվող գրողի ստեղծագործությունը:

Սույն ուսումնասիրությունն աներկբայորեն արդիական է, քանի որ թեմաները, որոնք արձարծված են Ռիչարդ Օլդինգթոնի երկերում՝ չեն կորցրել իրենց կարևորությունը մինչ օրս: Ժամանակավրեպ չեն սոցիալական և բարոյական խնդիրները, անհատի ներաշխարհի փլուզումը պատերազմյան և հետպատերազմյան ժամանակահատվածում, մարդու՝ հասարակությունից օտարման խնդիրը: Այս բոլոր հիմնահարցերը ներկայացված են Օլդինգթոնի երկերում, և դրանց ուսումնասիրությունը, գիտական շրջանառություն մտած գրական նյութը, հետազոտության արդյունքները կարող են հիմք ծառայել վերը նշված թեմաներին նվիրված գրականագիտական հետազոտությունների համար:

Ատենախոսության մեջ ներկայացվում է Օլդինգթոն գրողի տեղն ու դերը անգլիական գրականության մեջ, իսկ նրա վեպերը քննության են առնվում ըստ ժամանակային երեք՝ նախապատերազմյան, պատերազմյան և հետպատերազմյան ենթափուլերի: Ատենախոսը նշում է, որ Օլդինգթոնի երկերը պատշաճ ուշադրության չեն արժանացել նույնիսկ անգլիական գրականագիտության մեջ, և թեպետ առկա են որոշ ուսումնասիրություններ՝ դրանք հիմնականում նրա վեպերի նկարագրություններ են և չեն ներառում հերոս-ժամանակաշրջան աղերսների, հոգեբանական հիմնախնդիրների և դրանց աղավաղման պատճառների մանրակրկիտ վերլուծություն: Ոստի ներկայացվող ատենախոսությունը գալիս է լրացնելու այդ բացը և պայմանավորում է աշխատանքի **նորույթը**:

Ատենախոսության առաջին՝ «Պատերազմի ընկալումը զարգացման ընթացքի մեջ» գլխում ատենախոսի ուշադրության կենտրոնում երկու հիմնախնդիր է՝ պատերազմի օլդինգթոնյան ընկալումները և պատերազմի գեղարվեստականացումը «Վերոսի մահը» վեպում: Թեպետ առաջին գլուխը վերնագրելիս ատենախոսը նշում է միայն «Վերոսի մահը» վեպը, վերլուծության է ենթարկում «Գնդապետ աղջիկը» և «Բոլոր մարդիկ թշնամիներ են» վեպերը նույնպես՝ որպես միմյանց շարունակություն սերունդների դրամայի, բախման, սիրո և խնդիրների արժարժման առումով:

Ատենախոսության առաջին գլխում Օլդինգթոնի արձակը համեմատվում է Հեմինգուեյի, Բարբյուսի և Ռեմարկի երկերի հետ, որի արդյունքում ատենախոսը գալիս է այն արդարացի եզրահանգմանը, որ Օլդինգթոնի վեպերը շահեկանորեն առանձնանում են այն առումով, որ գրական հերոսը մտավորական է, որ կան ժամանակային փոխասերումներ, որ պատումում հատկապես կարևորվում է իրադարձությունների հոգեբանական կողմը, անհատի ներաշխարհի աստիճանական ընթացքը, որն էլ, ի վերջո, հանգեցնում է միայնության դրամայի: Դրվատելի է նաև ատենախոսի կողմից ներկայացված՝ «Վերոսի մահը» վեպում պատումին և գրողի պոետիկային վերաբերող տարրերի՝ պատումի ձևին, կառուցվածքին, իմպրովիզացիային, ռիթմի և տեմպի փոփոխություններին, պաթոսի, հեզնանքի, ծաղրի առկայացման մասին վերլուծությունները:

Ատենախոսության **երկրորդ և երրորդ** գլուխներում սեր-էրոսի, կին-տղամարդ փոխահաբերությունների և հետպատերազմյան հարացույցում՝ մարդ-հասարակություն հիմնախնդրի թեմատիկան է: Ատենախոսի նպատակն է ուսումնասիրել օլդինգթոնյան հերոսների և արտաքին աշխարհի առնչությունների խնդիրը, ինչպես նաև այն ներքին

հոգեբանական վիճակները, որոնք ի հայտ են գալիս պատարագմյան և հետպատերազմյան իրականության հետ բախվելիս:

Օլդինգթոնի հերոսներն աչքի են ընկնում բարդ մտածողությամբ և անհանգիստ ներաշխարհով: Գրողը փորձում է ցույց տալ հետպատերազմյան կյանքի անկայունության և անհուսալիության ազդեցությունը մարդու վրա: Սակայն օգնության է գալիս հեղինակի լավատեսական վերաբերմունքը վատ երևույթների նկատմամբ, այն, որ չհասկացված և միայնակ մարդիկ մի օր կգտնեն ներդաշնակ վիճակ, սեր և գեղեցկություն, իսկ աշխարհը կդառնա ուրիշ:

Ատենախոսության *Եզրակացություն* բաժնում ներկայացված են այն հիմնական դրույթները, որոնց ատենախոսը հանգել է ուսումնասիրության արդյունքում և որոնք պատասխանն են ատենախոսության սկզբում առաջադրված հարցադրումներին:

Այդուհանդերձ, հարկ ենք համարում ներկայացնել մի քանի նկատառում և առաջարկ, որոնք, կարծում ենք, ատենախոսը կարող է հաշվի առնել գիտական հետազոտությունների ընթացքում: Մասնավորապես՝

1. Ատենախոսության արդիականության, գիտական խնդիրների ձևակերպումները երբեմն շտկման կարիք ունեն, օրինակ՝ գիտական հենք չունի ատենախոսի ներկայացրած՝ **«*փեսանելի դարձնել հեղափոխության անհատի ֆիզիկական ու հոգեկան փանջանքի, հեղաշրջումների ընթացքն ու դրանից բխող հեղևանքներն ըստ Օլդինգթոնի*»** Կամ՝ **«*Աշխատանքի թեման արդիական է, քանի որ պատերազմները, դժբախտաբար, բացառություն չեն մեր օրերում: Հեղինակի՝ հակապատերազմական փրամադրությունների բացահայտումներն ու քննարկվող խնդիրները.....կարող են օգտակար լինել մեզանում եղած կաթվածահար վիճակը, մարդու սոցիալականացման նույնպիսի խնդիրներ լուծելու, հաղթահարելու իմաստով*»** //ատենախոսություն՝ էջ 5, 9, սեղմագիր՝ էջ 3, 4/ ձևակերպումները: Կարծում ենք, նման խնդիրները հիմնականում, պատմաբանների, սոցիոլոգների կամ հոգեբանների վերլուծության տիրույթում են, իսկ գրականագիտական վերլուծություններն այլ նպատակ պիտի հետապնդեն, և այլ ձևակերպումներ ստանան, օրինակ, թե՛ վերը նշված խնդիրները Օլդինգթոնի արձակում

ինչպիսի գեղարվեստական լուծումներ են ստացել, կամ գրողն ինչ գրական հնարների միջոցով է ներկայացրել, ասենք, կորուսյալ սերնդի կեցության կերպը և այլն:

2. Ատենախոսության մեջ սակավ են Օլդինգթոնի արձակի գեղագիտությանը նվիրված վերլուծությունը, պատկերային համակարգի ներկայացումը: Մինչդեռ գրողի ստեղծագործություններում կարելի է հանդիպել պատկերային և խորհրդանշային ամենատարբեր զուգորդումների: Կարծում ենք, աշխատանքն առավել կշահեր, եթե լիներ նաև Օլդինգթոնի արձակի նման վերլուծություն:
3. Աշխատանքի մեթոդաբանական հիմքը ենթաբաժնում /ատենախոսություն՝ էջ 8, սեղմագիր՝ էջ 5/ ատենախոսը խոսում է սոսկ գրականագիտական այն մեթոդների մասին, որոնցով առաջնորդվել է ուսումնասիրությունն իրականացնելիս: Սակայն **մեթոդը և մեթոդաբանությունը** տարբեր հասկացություններ են: Որոշակի առարկայի վերաբերյալ խնդրի բարձրաձայնումը, վարկածի մշակումը, տվյալների հավաքումը, վերլուծությունը և եզրակացությունները իրականացվում են հետազոտության **մեթոդների** միջոցով: Իսկ հետազոտության **մեթոդաբանությունն** այն հիմքն է, որն օգնում է հասկանալ կիրառվող մեթոդների արդյունավետության վրա ազդող որոշիչները¹:

Մեթոդաբանությունը տվյալ հետազոտության այն մետալեզուին է, տեսական այն դրույթները, գործիքակազմը, որոնք ապահավում են վերլուծության տեսական-մեթոդաբանական ապարատը:

4. Ատենախոսության մեջ երբեմն տեղ են գտել շարադրանքի լեզվիմաստային անհարթություններ, օրինակ՝ **մարդկային և պետական հարաբերություններ** /գուցե՝ մարդու և պետության միջև փոխհարաբերությունները /ատենախոսություն՝ էջ, սեղմագիր՝ էջ 9/, կամ **Օլդինգթոնի համեմատությունը Հենիգուեյի և Ռեմարկի հետ** /գուցե՝ նրանց ստեղծագործությունների համեմատությունը / ատենախոսություն՝ էջ 5, սեղմագիր՝ էջ 6/ և այլն:
5. Ցանկալի կլիներ եզրակացություններ բաժնում լինեին առավել հստակ, գրականագիտական եզրաբանությամբ և ուսումնասիրված ստեղծագործություններին վերաբերող կոնկրետ եզրահանգումներ:

¹ /տես՝ <https://hy.living-in-belgium.com/difference-between-research-method-and-research-methodology-607/>; <https://paara.am> > wp-content > uploads > 2012/06/:

Այդուհանդերձ, վերը նշվածը չի նսեմացնում ատենախոսի կատարած ուսումնասիրության կարևորությունը: **ՄԱՐԻԱՄ ԱՐԱՄԻ ՍԻՐՈՒՆՅԱՆԻ «ՊԱՏԵՐԱԶՄԸ ԵՎ ՕԼԴԻՆԳՅՈՒՆԻ ՎԵՊԵՐԸ. ԲԱՐՈՅԱԿԱՆ ԵՎ ՍՈՑԻԱԼԱԿԱՆ ԱՍՊԵԿՏՆԵՐ»** թեմայով ատենախոսությունը ընդգրկուն և համապարփակ ուսումնասիրություն է և բավարարում է թեկնածուական աշխատանքին ներկայացվող պահանջները:

Սեղմագրում ներկայացված դրույթները և տպագիր աշխատանքները համապատասխանում են ատենախոսության բովանդակությանը:

Վերը նշվածը հնարավորություն է տալիս միջնորդել ՀՀ ԲՈԿ-ի՝ Երևանի պետական համալսարանում գործող 066 «Արտասահմանյան գրականություն» մասնագիտական խորհրդին՝ **Մարիամ Արամի Սիրունյանի «Պատերազմը և Օլդինգթոնի վեպերը. բարոյական և սոցիալական ասպեկտներ»** թեմայով ատենախոսության համար շնորհել բանասիրական գիտությունների թեկնածուի գիտական աստիճան:

Գայանե Եղիազարյան
բանասիրական գիտությունների դոկտոր, պրոֆեսոր
«Վ. Բրյուսովի անվան պետական համալսարան» հիմնադրամի
Անգլերենի ամբիոնի վարիչ

Եղիազարյանի ստորագրությունը հաստատում են
Հասմիկ Փիլավջյան
«Վ. Բրյուսովի անվան պետական համալսարան» հիմնադրամի
գիտական քարտուղար



04.04.2022